





先師孔子聖學述略

先師孔子聖學述略

山西道德學社主講狄觀滄敬述

謹案郭氏希仁聖蹟備考余氏炳文儒史略其於聖學蓋言之詳矣此並取之而間參以劉止唐先生之說偶有所見亦附篇末別以附註極知淺陋閱者諒之

春秋魯襄公二十一年冬十一月庚子孔子生於魯昌平鄉陬邑闕里

(附註) 此年月從穀梁傳潛邱劄記考定爲魯襄公二十二年冬十月庚子即

夏正八月二十七日

孔子之先宋人也七世祖曰正考父正考父生孔父嘉嘉爲宋大司馬爲華父督所害子孫因以孔爲氏孔父生木金父木金父生皋夷皋夷生防叔防叔畏華氏之偏奔魯故孔氏爲魯人防叔生伯夏伯夏生叔梁紇是爲聖父紇爲陬大夫娶施氏無子其妾生孟皮有足疾晚求婚於顏氏顏氏三女小曰徵在遂

以妻之是爲聖母徵在既往廟見以夫年大懼不時有男禱於尼丘之山孔子生焉因名曰丘字仲尼云孔子爲兒嬉戲嘗陳俎豆設禮容長九尺有六寸人皆謂之爲長人而異之

(附註)孔子之先爲宋人宋商裔也其始祖曰契爲虞廷司徒敬敷五教使君臣有義父子有親夫婦有別長幼有序朋友有信孔子生而知禮明倫節紀以爲人道立極其淵源之遠蓋有所自或曰詩商頌天命玄鳥降而生商註謂契母簡狄吞玄鳥之卵而生契也契子姓玄鳥說文乙也又厥初生契之祥而子乙重文爲孔是孔子與契一縷血脈遙遙相承故能以匹夫而繼契之緒大暢宗風師表萬世別開素王之局不可謂非契之餘慶耶其說亦爲有理

魯昭公七年孔子年十七以好禮爲魯大夫孟釐子所知

孟釐子病且死誠其嗣懿子曰孔某聖人之後也而滅於宋吾聞聖人之後雖

不當世必有達者今孔某年少好禮其達者歟吾即沒若必師之及釐子卒懿子遂與南宮敬叔來學禮

(附註)此據史記故與左氏所載人名年世不符

魯昭公十年孔子年二十適周問禮見柱下史老聃始得六經

孔子適周問禮於老聃南宮敬叔爲言於魯君昭公予之一乘車兩馬一豎子遂至周見老聃老聃者宋沛人也仕周爲柱下守藏史因列史之遺部爲六經一曰詩凡三千餘篇二曰書亦三千餘篇三曰禮經禮三百曲禮三千四曰樂篇數今失考五曰易經卦八別卦六十四六曰春秋始終百二十國此六經有述無作而實爲有史以來第一大觀孔子至遂全爲發之俾縱觀焉居久之孔子辭去老子贈以言曰聰明深察而近於死者好議人者也博辨廣大而危其身者發人之惡者也孔子曰謹受教

(附註)孔子居周甚久其面爲告語當非一事即莊子所載至陰肅肅至陽

赫赫肅肅出乎天赫赫發乎地四語觀之亦足闡十六字未傳之祕而有以辨乎先後天之分爲孔子祖述憲章刪訂詩書贊周易作春秋之張本云此義發自劉止唐先生茲錄其言曰至陰者真火也至陽者真水也陽孕乎陰而藏金性之始也陰居於陽而含木情之苗也先天以乾坤定子午爲性命之真爻後天以坎離代乾坤乃金木之變化乾性也坤命也性命合而太極生人之所以父母天地也離情也坎性也性情顛倒而七情擾知覺之所以非初也肅肅則返乎陰之常赫赫亦還其陽之正出乎天本乎地明乎先天後天之互爲顛倒而周子互爲其宅之論所由來也且其間尤有不可以言盡者乾坤之功用坎離日月運行五行萬物之所爲消長也而乾坤未始無其功坎離之橐籥在乾坤上蟠下際三界十方之所以無極也而坎離又未始不藏其用人秉天地而生受氣父母而育父母非乾坤而乾坤則早通於父母天地爲父母而父母又若不侔於天地至陰至陽之兩化一神尤有

莫測其機者矣孔子誠知老子之大故歎爲猶龍豈第以其典司禮籍遂推爲僅有哉

〔文註〕孔子好學敏求而無常師聞郟子朝魯言黃帝以來官名見而學之既而告人曰天子失官學在四夷猶信在齊聞韶學之三月不知肉味又嘗訪樂於襄弘學琴於師襄是以獨能成其爲大然心性之學必傳自老子周秦諸子所載非盡無稽且吾聞諸老聃吾從老聃孔子亦自言之見於戴記昌黎之言豈足據哉

魯定公九年孔子年五十一從老聃於沛追論六經

自孔子去周老子旋亦致仕居沛至是孔子之沛就見老子曰丘於六經自以爲熟矣而無所遇焉老子曰甚矣子之不遇也夫六經先王之陳迹也豈以其迹哉孔子自是澄觀世變消息時宜慨然有刪訂之志

是年定公以孔子爲中都宰孔子初仕制爲養生送死之節長幼異食強弱異

任男女別塗一年而四方則之定公謂孔子曰學子此法以治魯國如何對曰雖天下可也由中都宰爲司空別五土之性物各得其所生之宜十年由司空爲司寇夾谷之會定公且以乘車好往孔子曰臣聞有文事者必有武備有武事者必有文備請具左右司馬會遇禮畢犁彌言於齊侯曰孔丘知禮而無勇若使萊人以兵劫魯侯必得志焉齊侯從之孔子以定公退曰士兵之兩君合好而裔夷之俘以兵亂之非齊君所以命諸侯也齊侯聞之遽辟之將盟齊人加於載書曰齊師出境而不以甲三百乘從我者有如此盟孔子揖對曰而不以反我汶陽之田吾以共命者亦如之於是歸所侵魯田以謝過十二年由大司寇攝行相事誅魯大夫亂政者少正卯與聞國政乃言於定公曰今三家過制請損之使仲由爲季氏宰將墮三都叔孫氏先墮季氏將墮費公山不狃叔孫輒率費人襲魯孔子命申句須樂頎伐之敗諸姑蔑遂墮墮費將墮成公斂處父謂孟孫曰子僞不知我將弗墮孔子爲政強公室弱私家尊君卑臣三月政

化大行鬻牛馬者不儲價賣羔豚者不加飾男女行者別於塗塗不拾遺夜不閉戶四方客至不求有司皆如歸焉齊人聞而懼之遣女樂季桓子受之三日不朝孔子行

魯哀公十一年孔子年六十八自衛返魯改定六經爲五經儒學始興

季桓子卒遺命康子必召仲尼至是以幣來迎孔子遂自衛返魯孔子去魯凡十四年徧歷各國自知不用於是取所受於老子六經從事刪述教授及門三歲書成部爲五經一曰易專以乾坤爲經餘皆爲別凡二篇孔子晚年喜易故又爲序彖象繫說卦文言雜卦以翼易二曰尚書古書三千餘篇孔子序書傳上紀唐虞之際下至秦穆凡二十八篇三曰詩古詩亦三千餘篇孔子去其重複取可施於義理上探契后稷中述殷周之盛至幽厲之缺以關雎爲風始鹿鳴爲小雅始文王爲大雅始清廟爲頌始凡三百五篇四曰禮官禮五篇士禮十七篇君師分統以辨上下定民志五曰春秋起隱訖哀始終十二公據魯親

周故殷運之三代上明三王之道下辨人事之紀別嫌疑明是非定猶豫善善惡惡賢賢賤不肖是非二百四十年之中以爲天下儀表天子退諸侯討大夫以達王事當一王之法度後有王者舉而措之春秋之義行則天下之亂臣賊子懼焉孔子在位聽訟文辭有可與人共者弗獨有也獨爲春秋筆則筆削則削游夏之徒不能贊一辭嘗曰後世知丘者以春秋罪丘者亦以春秋自是四方之士來受學者益衆孔子乃築杏壇垂緇帷分置四科廣宣三物中定車服禮器之宜修明冠婚喪虞之制提倡鄉飲大射之俗不數年魯人化之徙而家者百餘室人至擬爲素王之局云

(附註) 於孔子問禮老聃而知儒道之同源於孔子改定六經爲五經而知儒道之分派

(又註) 孔子教弟子以入則孝出則弟謹而信汎愛衆而親仁行有餘力則以學文此小學之教也其所傳曾子大學之道則曰在明明德在親民在止

於至善也孔子生平學而不厭誨人不倦循循善誘故弟子之多至於三千身通六藝者七十二人焉間嘗歷述其所學則曰吾十有五而志於學孟子所謂可欲之謂善也三十而立則有諸已而信矣四十不惑黃中通理正位居體暢於四肢充實之謂美五十而知天命窮理盡性以至於命洞洞屬屬明通公溥與天地合其德充實而有光輝之謂大六十而耳順聲入心通寂然不動之天超然元音之表吹萬不同而融洽分明一切無礙大而化之之謂聖七十而從心所欲不踰距其心爲天地之心其氣即天地之氣渾然太虛萬象羅列入乎形色之中出乎形色之外聖而不可知之之謂神矣此蓋聖學之極則也而欲遊於是則非明善誠身知止有定致曲有誠無由得而化之也是在學者之好學深思能自得師而已

(附錄) 儒史略曰君師二統之義五經中言此者不一而其制則確具於官禮官禮既有國王以立國統矣而又有鄉老以立邦統國統中凡三百七十

八人專舉治典邦統中凡一萬八千九百三十六人專舉教典二者互相爲用而兩不相侵以故朝廷之上王爲主而老爲賓學校之中老爲師而王爲弟爲問此非二統而何也蓋此二者之必分實因事勢之當然大凡治人之權須高出民上而教人之權又須深入民中若竟制於一尊必轉隣於偏廢今直以分之者舉之則上既無專制之主下亦無不制之民太平大同之效所由起也

魯哀公十六年孔子年七十三夏四月己丑卒

孔子病方負杖逍遙於門歌曰泰山其頽乎梁木其壞乎哲人其萎乎子貢聞之遂趨而入孔子曰予疇昔之夜夢坐奠於兩楹之間夫明王不興天下其孰能宗予予始將死也寢疾七日而沒哀公誄之曰旻天不弔不慈遺一老伴屏余一人以在位莞莞余在疚嗚呼哀哉尼父孔子卒葬魯城北泗上弟子皆服心喪三年三年心喪畢相訣而去則哭各盡哀或復留惟子貢廬於家上凡六

年然後去弟子及魯人往從冢而居者百有餘家因名曰孔里魯世世相傳以歲時奉祠孔子冢而諸儒亦講禮鄉飲大射於孔子冢至於漢二百餘年不絕高帝過魯以太牢祠焉平帝追諡爲褒成宣尼父北魏孝文改爲文聖尼父唐太宗尊爲先師尼父宋眞宗改爲元聖文宣王元武宗加封爲大成至聖文宣王明世宗釐正祀典始改爲至聖先師孔子遂至今爲定稱云孔子十九歲娶宋之卅官氏生伯魚伯魚之生魯昭公以鯉賜孔子因以名之伯魚年五十先孔子卒伯魚生子伋字子思年六十二作中庸孔子沒後門弟子各記所聞爲論語二十篇及家語諸書行世

漢太史公司馬遷曰詩有之高山仰止景行行止雖不能至然心嚮往之余讀孔氏書想見其爲人適魯觀仲尼廟堂車服禮器諸生以時習禮其家余低回留之不能去云天下君王至於賢人衆矣當時則榮沒則已焉孔子布衣傳十餘世學者宗子自天子王侯中國言六藝者折中於夫子可謂至聖矣

10

492843

492843

492843